

124930

REGIÆ MAJESTATIS BORUSSICÆ
LITTERAE
PATENTES,

QVIBVS

NOVA REI JVDICIARIAE

TAM SAECVLARIS, QVAM ECCLESIASTICAE
CONSTITVTIO

IN

TERRIS PRVSSIAE

ET

POMERANIAE,

A REGIBVS POLONIAE HVCVSQVE POSSESSIS,

NEC NON IN

TRACTIBVS, CIS AMNEM NOTESIVM,
SEV NOTEZAM SITIS,

AD MAJOREM POLONIAM HVCVSQVE RELATIS,

OMNIBVS NVNC

AB AVGVSTISSIMO BORVSSIAE REGE

OCCVPATIS ET VINDICATIS,

ANNVNCIATVR ET NOTIFICATVR.

DATAE BEROLINI DIE xxviii. SEPTEMBRIS MDCCLXXII.

TYPIS GEORGII JACOBI DECKERI, TYPOGRAPHI REGII.

RECEIVED
JAN 11 1891
21 JAN 11 1891
JAN 11 1891
JAN 11 1891

124930
III 65





FRIDERICVS Dei Gratia Rex
Borussiae, Marggravius Brandenburgensis,
Sacri Romani Imperii Camerarius et Princeps Elector,
Supremus Silesiae Dux, Princeps Supremus Arausionensis,
Novi Castri et Valengiae, nec non Comitatus Glacensis, Geldriae,
Magdeburgi, Cliviae, Juliaci, Montium, Stettini, Pomeraniae,
Cassubiorum, Vandalorum, et Megapolis, nec non Crosnae Dux,
Burggravius Norimbergensis, Princeps Halberstadii, Mindae, Ca-
mini, Vandalii, Suerini, Raceburgi, Ost-Frisiae et Mursae, Comes
Hohenzolleræ, Ruppini, Marcæ, Ravensbergi, Hohensteinii,
Tecklenburgi, Suerini, Lingæ, Buræ et Leerdami, Dominus Ra-
vensteinii, Rostochii, Stargardæ, Lauenburgi, Butoviae, Arlayæ
et Bredæ, &c. &c. &c.

Significamus omnibus, quorum interest, postquam legitimi domini, publica
Descriptione exposito et demonstrato jure, detentas hucusque injuste a Regibus
Poloniae, et ab avito domus Nostrae patrimonio vi iniqua avulsas terras Prussiae
et Pomeraniae, nec non ad majorem Poloniam huc usque relatos districtus, cis
amnem Notesium seu Notezam sitos, nimirum:

- 1) Warmiam,
- 2) Marienburgensem ditionem,
- 3) Culmensensem ditionem, districtu Micheloviensi comprehenso, exce-
pto Thoruno, ejusque territorio,
- 4) Pomerelliam, ejusque ambitu comprehensos tractus, cis Notesium
seu Notezam flumen sitos, excepto Gedano, ejusque territorio;

iterum vindicavimus et occupavimus, præstitumque jam Nobis est, ceu legitimo domino et imperanti a provinciarum et ditionum harum incolis, cujusvis dignitatis et ordinis, sæcularibus, æque ac ecclesiasticis, homagium, ac fidelitatis et subjectionis juramentum: nullam magis regionum Nostrum animum urgere sollicitudinem, quam eam, ut efficiamus, quo jus in hisce Nostræ imperii regionibus in posterum cuilibet, sine personarum respectu et discrimine æquum dicatur, et quo provinciæ illæ, Nostræ dominationi recens subjectæ, insignis ejus felicitatis reddantur participes, qua reliqui Nostro imperio subjecti populi gaudent, ut nimirum judicia exerceantur non modo sancte et integre, verum remotis quoque omnibus ambagibus, et ea celeritate et festinatione, quam accurata causarum forensium disceptatio patitur, et litigantium expectatio flagitat.

I. Non concedit igitur ista, quæ Nobis in primis cordi est, cura, istudque studium justitiæ intemeratæ Nostrum, ut subditorum, Nostram in tutelam et protectionem noviter receptorum vitam, salutem, libertatem, fortunas et bona decantatæ omnium querimoniis, et ab ipsis Polonis rerum suarum scriptoribus atro colore depictæ, judiciorum, huc usque constitutorum, violentiæ et tumultuariæ ac perturbatæ procedendi rationi, ab accurata causarum dirimendarum via adeo deflectenti et abhorrenti, porro exponi sinamus; omnia potius, quæ huc usque viguerunt, et hisce provinciis jus dixerunt, judicia, quocunque nomine usa fuerint, nimirum judicia terrestria, judicia castrensia, judicia palatinalia et vice-palatinalia, judicia querularum, judicia capitanealia, judicia arcium, judicia episcopalia, judicia capitulorum ecclesiarum cathedralium et collegiatarum, aliaque hujus generis, penitus tollenda et evertenda esse, censuimus, et vigore hujus sanctionis tollimus, evertimus et abolemus, iisque omnem jurisdictionem, auctoritatem et potestatem abrogamus et adimimus sine causarum discrimine, siue publicæ sint, siue privatæ; adeoque omnes etiam provocaciones et appellationes ad superiora, quæ hæcenus provocaciones ab illis receperunt, judicia, ad judicia specialia comitiarum provincialium, ad comitia, quæ vocarunt, particularia, ad conventum generalem, seu comitia provinciæ generalia, ad judicium provinciale superius, ad Tribunalia Poloniæ, extra provincias hæc constituta, nimirum ad Tribunal, quod Petricoviæ sedem habet suam, ad judicia assessorialia, ad judicia relationum, ad aulam et consistorium Regum Poloniæ, sponte ultroque cessant et expirant, easque penitus abolemus, abrogamus, vetamus et prohibemus.

II. Ob eandem rationem subditos, Nostro imperio noviter subjectos, eorumque vitam, famam, libertatem, securitatem, patrimonium, fortunas eo periculo et discrimine liberare constituimus, in quo ob legum juriumque, huc usque in hisce regionibus usu vigentium obscuritatem, incertamque et mancā rationem versabantur, et in quod per turbulentum perversumque judiciorum statum et procedendi modum quotidie adducebantur. Omnes igitur, quæ huc usque in hisce provinciis et ditionibus, Nostro recens adjectis regno, viguerunt, usque obtinuerunt leges, omnesque constitutiones et sanctiones, quibus vel ipsa civium jura, vel negotiorum et actuum civilium forma et solemnitates, vel ordo judiciarius definiuntur et præscribuntur, a die publicationis patentium harum litterarum, earumque virtute, penitus abolemus, abrogamus, proscribimus, et intuitu futurorum, quæ in posterum ab hoc inde die suscipiuntur et expediuntur, negotiorum, omni auctoritate, valore, et obligandi potestate privamus et denuodamus.

III. In locum vero horum jurium abolitorum surrogamus & substituimus eas leges, constitutiones, sanctiones, eaque jura, eumque judiciorum & processus forensis ordinem, quibus Regnum Nostrum Borussiae huc usque usum fuit, idque eo convenientius aptiusque judicavimus, quo consultum magis & naturale Nobis videtur, provincias & ditiones, nunc vindicatas à Nobis & occupatas iis in posterum regi legibus, quibus olim jam illarum pleræque usæ fuerunt, cum adhuc partem constituerent Regni illius, cui nunc denuo uniuntur & incorporantur.

Eadem

Eadem igitur Regni Borussiae jura, eandemque administrationis rei publicae rationem, quae in illo obtinent, in acquisitis & recuperatis recens ditionibus etiam, certis tamen sub modificationibus & definitionibus, introducimus & stabilimus, eamque normam & regulam unice a novis subditis observari jubemus.

IV. Quum igitur ad fundamenta administrationis imperii Nostri referatur & pertineat ratio illa, ut illius partes distincte separentur, adeoque reddituum omnium publicorum, fisci aëariiue cura, politicae universae moderamen, & totius oeconomiae publicae directio collegiis Nostris cameralibus & domanialibus universim, speciatim vero certis & particularibus, quas vocant commissionibus & deputationibus, pro rerum diversitate nomen inde proprium sortientibus, demandentur & delegentur: pertinent etiam & perpetuo in ditionibus hisce occupatis pertinebunt, juxta fundamentalem Nostram & pragmaticam sanctionem ea de re die XIX. Junii, Anni MDCCXLIX. promulgatam, ad curam, administrationem, moderamen, jurisdictionem collegiorum Nostrorum domanialium & cameralium causae & res, sequenti enumeratae & recensitae indice:

- I. Tributa & collationes, harumque distributio, exactio, peraequatio, &c.
- II. Vectigalia & portoria.
- III. Accisae.
- IV. Nemora regia ac sylvae domaniales, venatio in iis, ejusque emolumenta.
- V. Cursus publicus, seu Postae.
- VI. Res monetariae.
- VII. Res metallica, & proventus metallifodinarum.
- VIII. Salinae, & salis vendendi ratio.
- IX. Monopolium regium Tabaci, seu herbae nicotianae.
- X. Charta signata, & chartae lusoriae signatae, earumque monopolium.
- XI. Moderamen & regimen ac inspectio omnium artium, opificiorum, negotiationum, tribuum & collegiorum opificum.
- XII. Fabricae, textrinae, artificia & opera manuvaria.
- XIII. Commercia terrestria & maritima, eorumque varia genera.
- XIV. Societates affecurationum.
- XV. Coloniarum institutio, & agrorum desertorum cultura, colonorum deductio, collocatio.
- XVI. Viae publicae & pontes.
- XVII. Fossarum purgatio & deterfio, & rivoꝝ resectio.
- XVIII. Aquae libere profluentis procuratio, aggeres.
- XIX. Navigatio maritima, nec non in canalibus, fluminibus publicis, rivis &c.
- XX. Incendiorum avertendorum & restringendorum media.
- XXI. Platearum, Stratarum & straturae seu pavimentorum resectio, conservatio.
- XXII. Fora publica.
- XXIII. Fontes & aquaeductus, putei, fistulae.
- XXIV. Lucernae nocturnae et lampades urbium, illustrationis et securitatis causa institutae.
- XXV. Taxae panis et carnis venalis.
- XXVI. Mensurarum, ulnae et ponderum constitutio.
- XXVII. Reditus civitatum regiarum, earumque, et omnium municipiorum aëaria, horumque bona, redditus.
- XXVIII. Res omnis cerevisiaria, cerevisiaeque coquendae et dividendae ratio, quaestus et politia in civitatibus.
- XXIX. Aquarum ardentium, et vini adusti quaestus in civitatibus.
- XXX. Rei militaris procuraciones circa itinera militum et exercitus, circa metata et hospitationes militum, circa salgamum et epidemetica, annonam militarem et com meatum, angarias et parangarias, circa pabuli, fœni, frumenti in horreis militaribus inferendi et condendi rationem.

V. Reliquas vero omnes publicæ administrationis partes, et cæteras res causasque tam civiles, quam ecclesiasticas, quarum cura et moderamen in Borussia regno ad Regimen, ad Tribunal, ad iudicium aulicum, tam in civilibus, quam in criminalibus, porro ad Collegium Pupillare, ad Consistorium, Regiomonti sedem habentia, spectat et pertinet, siue illæ ab ipsis hisce collegiis, siue sub eorum auctoritate et directione a piis corporibus, magistratibus et iudiciis inferioribus procurentur et administrentur, demandamus, committimus et delegamus in provinciis et ditionibus, sub Nostram recens redactis dominationem, *Judicio supremo aulico et provinciale*, quod in urbe Insulæ Marianæ instituimus et ordinavimus, eique omnem auctoritatem, potestatem, jurisdictionem tribuimus, quæ dicta Regni Borussia Collegia gaudent, ea quidem ratione, eoque modo, ut *Judicium hocce supremum aulicum et provinciale* a Nobis institutum, Nobis et Nostro sanctiori status consilio, ejusque variis pro causarum et negotiorum differentia curiis, nec non superioribus, quæ Berolini sedem habent, Collegiis pareat, subsit, et unice ac immediate subordinatum existimetur.

VI. Hoc proinde *Judicium supremum aulicum et provinciale*, in urbe Marianæ insulæ constitutum, omnia in vindicatis hisce ditionibus negotia publica expediet, summi imperii et superioritatis territorialis partes administrabit, Regalium et imprimis jurium Nostrorum circa sacra procuracione fungetur, omniumque eorum publicæ administrationis momentorum curam habebit, quæ secundum sanctionem pragmaticam die XIX. Junii A. MDCCXLIX. promulgatam, Collegiis Regiminis et justitiæ superioribus, in Nostreis ditionibus universim, speciatim vero in Borussia Regno supremo Regiminis Senatui delegata et attributa sunt. Eo, exempli gratia, spectant litterarum cum vicinis in negotiis ditionum vindicatarum publicis commercium, cura limitum publicorum, tuitio et moderamen libertatis conscientiæ et cultus publici, secundum cujuslibet de rebus divinis animi sensum; rectio et gubernatio cleri universim; cautio et vigilans provisio, ne ex sacerdotum moliminibus res publica detrimenti quid capiat, neve sine hujus, ad administrationem Nostra vice summi imperii a Nobis instituti Dicasterii supremi scientia veniaque et consensu ulla vel Pontificis Romani, vel Episcoporum constitutio, Bulla ac sanctio promulgetur ac divulgetur.

VII. Præter hæc suprema sacrorum jura, quæ Nobis, tanquam Imperanti et Principi competunt, et quorum curam huic dicasterio supra demandavimus, eidem quoque earum rerum auctoritatem et procuracionem delegamus, quæ in imperii Nostri provinciis Consistoriis ecclesiasticis concredita sunt atque commissæ. Catholicis quidem et Romana colentibus sacra jurisdictionem ecclesiasticam, quam hucusque habuerunt, pro ea, qua in eos sumus indulgentia, hæc tamen sub restrictione et modificatione clementer servamus atque permittimus, ut hæc solis in causis vere ecclesiasticis et sacris exerceri queat, nec ad causas civiles et sæculares, clericum licet, vel clericorum redditus, decimas, jus patronatus, vel alias ejusmodi res profanas, sed religionis obtentu ad ecclesiæ tribunalia pertractas concernentes ac respicientes, nec ad crimina et delicta, quamvis specie ecclesiastica indaganda et punienda, extendatur.

Negotia contra ecclesiastica eorum, qui Evangelicæ religioni, siue Lutheranæ, siue sic vocatæ Reformatæ addicti sunt, omnemque in illorum causis jurisdictionem, Consistoriis vulgo tributam, procurabit et administrabit intra ditionum noviter vindicatarum ambitum istud, quod ordinavimus, *supremum Judicium aulicum et provinciale*, cujus ideo consortio adhuc sæculares et ecclesiasticos adjungere consiliarios consistoriales constituimus.

Causarum matrimonialium, quæ inter conjuges utrinque catholicos disceptantur, cognoscendarum et dirimendarum potestatem permittimus et indulgemus iudiciis catholicorum ecclesiasticis.

Quod si vero uterque, vel alter conjugum sacris evangelicis addictus sit, alter autem castra pontificia sequatur, tunc lites et controversiæ matrimoniales illorum, earumque disceptatio, et cognitio pertinent ad iudicia harum personarum civilia

civilia, ordinaria, nec ad ipsum istud supremum harum provinciarum Judicium pertrahi aliter possunt, nisi personæ et conjuges in civilibus proxime ejus sub sint jurisdictioni. Similiter actiones ex sponsalium pactione, sine discrimine religionis, coram ordinariis et civilibus judiciis intentari oportet, atque institui, nec illas alibi proponere, nec admittere licet.

VIII. Quum porro *supremum* hoc *Judicium aulicum* et *provinciale* eo potissimum consilio institutum sit, ut in ditionibus vindicatis vice Nostra jus dicat: illi omnia injungimus munia, quæis suprema in Nostro imperio justitiæ Collegia et dicasteria funguntur, nimirum:

- 1) Jurisdictionis civilis administrationem.
- 2) Jurisdictionis criminalis exercitium.
- 3) Supremam tutelam, omniumque rerum pupillarum rectionem et moderamen.

IX. Illa vero munia sese potissimum exserunt, et principaliter versantur,

- I. circa rectionem, intensionem, inspectionem et moderamen omnium in hisce ditionibus judiciorum et judicum, eorumque justitiæ administrationis.
- II. Circa supremam et propriam, quæ illi a Nobis demandata est, jurisdictionem exercendam et administrandam.

X. Abolitis vero omnibus supra judiciis, quæ huc usque in ditionibus nuper occupatis viguerunt, et abrogata illis et ademta omni jurisdictione, hæc sub Dicasterii Nostri supremi moderamine et inspectione nunc restat quidem, et servatur

- I. nobilibus, et prædiorum equestrium possessoribus, qui patrimonialem et prædicatoriam jurisdictionem legitimo titulo adquisiverunt, et in rusticos aliosque, qui ibi commorantur, homines ex legitimo titulo hætenus exercuerunt.
- II. Magistratibus municipiorum et urbium, justa jurisdictionis possessione munitis atque gaudentibus.

His quippe, si legitimum acquisitionis et possessionis titulum edere et docere valent, jurisdictionem hac sanctione confirmamus atque adserimus.

Quemadmodum vero juris dicendi munus, secundum constantem et perpetuam Nostram voluntatem et administrationis legem perpetuam, non nisi illis concedi et demandari potest, qui legitimo juris studio eam sibi legum scientiam comparaverunt, quam ardui hujus officii ratio efflagitat, quique publico examine luculenta ejus specimina ediderunt, et ad munus, quod ambiunt, idonei et habiles judicari fuerunt: ita nobilibus jurisdictione patrimoniali præditis, sub pœna privationis et amissionis, incumbit, ejus administrationem et curam non nisi tali delegare judici ac justituario, cujus doctrina legitimo examine explorata et sufficiens judicata, et cujus fides peculiari ad justitiæ administrationem sacramento adstricta est. In civitatibus et municipiis autem jurisdictionis exercitium et juris dicendi munus non nisi juris peritis magistratuum membris, speciatim huic officio destinatis, Consulibus quippe, Assessores, Syndicis, Secretariis, Actuariis demandari oportet, qui suam doctrinam et juris scientiam, suamque ad tale munus habilitatem Dicasterio Nostro supremo, examine et scrutinio prævio, satis probaverunt, confirmationem a Nobis impetraverunt, et fidem suam ad juris dicendi munus speciali sacramento obstrinxerunt.

Intuitu omnium vero aliarum personarum, rerum et causarum, neque prædicatoriæ nobilium, neque magistratuum municipalium jurisdictioni subjectarum et obnoxiarum constituimus et decrevimus, talia in ditionibus recens occupatis ordinare judicia, *supremo Nostro judicio aulico et provinciali subordinanda*, qualia jam in Borussia regno instituta sunt. Quibus quidem, pro ditionum amplitudine et indigentia numero satis sufficiente instituendis judiciis subordinatis in causis realibus et personalibus jurisdictionem tribuimus et delegabimus illam, quam huc usque judicia supra Nobis dissoluta et abolita exercuerunt. Interea vero

eam a supremo Dicafterio exercendam et administrandam curabimus, id quod causas vel ipsum instruet, et suæ vindicabit cognitioni, vel commissariis delegabit, prout ipsi commodum visum fuerit, vel alia ratione instruendas mandabit.

Omnia hæc, a Nobis confirmata nunc & stabilita non solum, sed in posterum quoque instituenda judicia *supremi judicii Nostri aulici & provincialis* inspectioni & directioni subsunt, idque providere & vigilare debet omni intentione & rigore, quo ab illis cuiusvis jus sancte & integre, omnium partium studio & personarum respectu procul habito, absque gratia vel odio dicatur. Quod si igitur quis de iustitia ipsi denegata, vel lentius iusto administrata, protelata, vel perversa conquerendi ansam causamque habere putet, is medelam auxiliumque ab hoc Dicafterio provinciali flagitare & obtinere debet. Huic vero incumbit, querelis ejusmodi præbere autem, illis medelam, explorata earum causa, adferre, judicia inferiora officii admonere, excitare, in rectum, si ab eo deflexerint, tramitem reducere, illisque legitimam causæ instruendæ & disceptandæ rationem, viamque monstrare. Judicia inferiora vero tenentur, ejus jussibus, mandatis, admonitionibus, præscriptisque normis sine tergiversatione obsequi & obtemperare. Quicumque iudices jussibus & mandatis illius morem gerere & obsequi detrectaverint, vel illis obniti ausi fuerint, severe & omni rigore plectentur, & pro perviciaciæ & obstinationis ratione jurisdictione vel munere privabuntur.

Horum vero judiciorum, Dicafterio supremo subsectorum jurisdictio & competentia intuitu personarum, coram illis forum suum sortientium, *in civilibus causis* hac definitur regula, ut in causis personalibus status & dignitatis & conditionis personarum litigantium habeatur ratio, in realibus vero causis forum rei sitæ absque personarum & dignitatis & status discrimine actori sequendum & eligendum sit, nec possessoris & domini, ejusque conditionis ulla in talibus causis ratio haberi possit.

Jurisditioni igitur magistratuum municipali, vel nobilium prædicatoriæ non subsunt, sed ea penitus exempti censentur, qui vel ob natalium splendorem, vel ob status dignationem, vel ob muneris & officii honorem singulari privilegio fori, seu foro privilegiario gaudent.

Illo vero fori privilegio gaudent, & illius virtute jurisdictione nobilium patrimoniali & municipali magistratuum exemptæ, secundum nostrorum judiciorum rationes, existimantur personæ potissimum sequentes:

a) omnes milites, & militaribus fungentes muneribus, cujuscunque ordinis & gradus, qui quippe in militari foro conveniendi sunt.

b) Omnes officiales Nostri civiles, muneribus ac officiis fungentes Nostri, vel honorum titulis a Nobis condecorati, qui in personalibus causis non nisi coram Nostri tribunalibus & dicafteriis conveniri possunt, & litem suscipere tenentur.

c) Omnes nobilitatis superioris & inferioris personæ.

d) Omnes universim sacerdotes & clerici, cuicumque sint addicti religioni & cultui.

Intuitu nobilium quidem & clericorum suo tempore specialius adhuc definiendi Nobis reservamus arbitrium, utrum & quatenus harum personarum exemptarum nonnullas judiciis adhuc a Nobis instituendis, & Dicafterio supremo submittendis particularibus, horumque jurisdictioni subicere & commendare, & hisce potestatem juris dicundi in illarum causis tribuere & impertiri velimus. Interea illarum in favorem hanc stabilimus regulam, supra jam propositam: ejusmodi personas natalium vel status, vel muneris sacri virtute foro gaudentes privilegiario & principali ac immediato, non nisi Nostri judiciis subjectas & omni nobilium jurisdictione patrimoniali, & magistratuum potestate in causis personalibus prorsus & perpetuo exemptas fore & solutas.

Quod causarum qualitatem attinet, iudices & magistratus propria & patrimoniali jurisdictione præditi sese omnium illarum causarum cognitione & tractatione abstinere debent, quæ secundum fundamentalem Nostre administratio-

nis legem ad curam & jurisdictionem collegiorum domanialium & cameralium, & specialium cum illis conjunctarum commissionum & curiarum, secundum sanctionem pragmaticam supra allegatam, & Paragraphum IV. harum Litterarum patentium pertinent & referuntur.

Jurisdictionis criminalis exercitium, ob abusus enormes & exorbitantes, qui huc usque grassati sunt, nemini, nisi legitimum & justum acquisitionis & possessionis titulum edere & docere valeat, permittere possumus atque concedere. Ratione fori autem competentiae eadem regulae in criminalibus observandae sunt causis, quae in civilibus obtinent, adeoque criminalis jurisdictio in illas solummodo personas competere, & exerceri potest, quae etiam in causis civilibus ejusdem judicis foro & potestati subjectae sunt. Quod si vero ejusmodi casus inciderint, qui moram non patiuntur, & ubi celeri judicis auxilio opus est, tunc judici ratione delinquentis personae incompetenti, non nisi apprehensio & incarcerationatio, nec non prima commissi facinoris notio, seu simplex indagatio, non vero cognitio aut sollemnior & accuratior inquisitio permittitur.

Sed legitimis etiam & competentibus rerum criminalium iudicibus, qui jurisdictionis ejusmodi, mixtique imperii rite adquisiti titulum edere & demonstrare valent, illorumque arbitrio vitam, famam, libertatem, securitatemque subditorum Nostrorum committere, eorumque capita talium iudicum & magistratuum sententiis subicere Nobis religioni ducimus. Hisce quidem legitimis rerum criminalium iudiciis, iusto titulo subnixis, inquisitionem, & processum criminalis instructionem, sed per rite constitutum iudicem & scabinos ac assessores minimum duo, sollemni jurejurando adstrictos peragendam & perficiendam, relinquimus & indulgemus. Verum enim vero decisionis & pronuntiationis arbitrium & auctoritatem *collegio rerum criminalium* adhuc instituendo reservamus, eaque propter praecipimus atque jubemus, ut iudicia illa sese decisione abstineant, actaque inquisitionis rite instructa cum concepta sententiae formula iudicio Nostro supremo aulico & provinciali exhibeant, sententiamque ejus jussu, a collegio ac senatu criminali conceptam, ejusque ulteriora intuitu publicationis & executionis mandata expectent, iisque sub poena amittendae & adimendae jurisdictionis, strictissime obtemperent.

Nobilem praeripimus & arduam administrationis justitiae & officii judicialis partem constituit *suprema*, quae omnibus iudicibus & magistratibus incumbit pupillorum, impuberum, minorum, amentium *tutela & cura*. Verum ejus munia, supine hactenus in hisce ditionibus neglecta penitusque posthabita esse comperrimus. Serio & severe igitur ejus officia omnibus inculcamus iudiciis & magistratibus, iisque commendamus & imperamus, ut supremae hujus tutelae partes in suo quisque suae jurisdictionis ambitu, & in eas quisque personas accurate & vigilanter exerceat & expleat, quarum parentes ipsius foro pro sua conditione subfuerunt, vel quae ipsae sub ejus jurisdictione fundos & praedia possident, & tanquam illorum possessores illius foro subjectae sunt, & curatore ad illorum administrationem peculiari indigent.

Quicumque iudices & magistratus in explendis hujus tutelae superioris, quae illis incumbit, muniis segnes extiterint, ejusque partem aliquam vel dolo vel culpa neglexerint, non modo oscitantiae poenas luent, verum etiam pupillis & minoribus, damnum inde patientibus ac laesis, omnem in subsidium indemnitatem praestare tenentur & compellentur.

Quo vero quilibet iudex & magistratus suo hac in re officio satisfaciat, & quo minoribus atque pupillis eo certius prospiciatur, Dicasterio, quod institui-
mus, supremo commendamus, & enixe injungimus, ut iudicia ipsi subordinata, vigilanter ea in re observet, & ad explenda hujus superioris tutelae munia omni occasione exhortetur atque extimulet, suisque monitionibus, mandatis, jussibus, quibus illa obtemperare moremque obsequiose gerere tenentur, illa in hac muneris functione dirigat, moderetur, impellat.

XI. Præter hanc judiciorum, quæ nunc confirmavimus, & adhuc instituemus & ordinabimus, inferiorum inspectionem, rectionem, observationem, quam *supremo Nostro judicio aulico et provinciali* injungimus & tribuimus, ei propriam quoque impertimur jurisdictionem eminentiorem, ejusque ambitu & complexu omnem judiciariæ potestatis cumulum contineri volumus atque involvi, exceptis tantummodo illis publicæ administrationis partibus, muniisque jurisdictionis, quæ

a) vel judiciis subordinatis, a Nobis jam stabilitis, vel adhuc institutendis, vel

β) collegiis domanialibus & cameralibus competunt, atque incumbunt.

Continentur proinde hujus judiciariæ, quam *supremo dicasterio* impertimur, potestatis ambitu omnes illæ.

α) *jurisdictionis civilis,*

β) *jurisdictionis criminalis,*

γ) *supremæ tutelæ*

partes & functiones, quæ in Borussia regno *judicio*, quod Regiomonti constitutum est, *aulico & rerum pupillarium Collegio* tributæ sunt, competunt atque incumbunt.

XII. Sicuti autem *supremum*, quod constituimus *Judicium aulicum et provinciale* Nostra vice imperii supremi administrationem exercet, Nostræque in ditionibus a Nobis vindicatis vice jus dicit: ita eidem ad reliquorum Nostræ dominationis dicasteriorum & curiarum superiorum exemplum, potestatem largimur, & auctoritatem concedimus, omnia mandata, jussa, rescripta, decreta, omnesque sententias Augusto Nostro nomine concipiendi & muniendi, eoque utendi curiæ stylo, iisque formulis & titulis, quibus alia Nostri imperii tribunalia uti consueverunt. Quumque hocce dicasterium in jure dicundo & exercendis summi imperii partibus Nostram majestatem representet; omnes, qui ei exhibentur & porriguntur libelli supplices, relationes, scriptiones forenses Nostri inscribi & insigniri titulis, & ad Nostram personam dirigi debent, id quod non a partibus solum, verum a judiciis quoque subordinatis observari reverentiæ & decori ratio postulat.

XIII. Omnia porro negotia, tam in hoc Dicasterio supremo, quam in judiciis ipsi subordinatis Teutonica lingua & idiomate Germanico expediri & omnes universim libellos, relationes judicum, epistolas, decreta, mandata, rescripta, sententias, protocollo hoc sermone concipi jubemus, præcipimus & imperamus. Qui linguæ Germanicæ imperiti sunt, iis interpretum auxilio subveniri debet & consuli, qui ipsis non modo in conscribendis libellis, sed etiam in explicandis sententiis & mandatis opitulari & operam præstare suam tenentur. Eadem interpretum opera etiam uti iudices oportet, si in civilibus vel criminalibus causis personas linguæ Germanicæ ignaras in jure interrogare vel examinare & audire velint. Ubi ejusmodi interpretum fidei explorata & sacramento obstricta copia deficit, sufficiens eorum numerus procurari debet atque constitui.

XIV. Naturalis societatum civilium ratio, ordoque illarum & tranquillitas vetat prohibetque, quo minus quisquam sibi ipse jus dicat sine judice, vimque exerceat privatam. Quicumque igitur Nostrorum subditorum de alterius injuria querendi causam habere putat, judicem adeat, ejusque auxilium imploret; quod si hujus iniquitate se gravatum existimet, judicio ac collegio superiori querimoniam exponat suam, & medelam ab illo petat & expectet; quod si etiam hujus se læsum oppressumque injustitia arbitretur, nec hujus se decretis acquiescere posse credat, rem & querelam deferat ad *sanctiorem Senatum & Ministerium Nostrum*, illamque illius curiam, ad quam istius causæ procuratio pertinet.

Patet quoque subditorum Nostrorum cuivis via ad solium Nostrum, nec ulli unquam audientiam, auxilium, protectionem, tutelamque, modo legitimam habear

habeat querendi causam, denegabimus. Verum caveant subditi, ne hac Nostra indulgentia, vel querelarum frivolitate ac temeritate, vel falsitate precum Nobis oblatarum, vel contemptu & præteritione judicis competentis proterve abutantur. Quicumque enim hujus sese temeritatis & audaciæ reos fecerint, illi non modo Nostram indignationem, sed & pœnam, legibus Nostris statutam, eamque severissimam sese incurfuros sciant.

XV. Idem fere ordo, eademque gradatio locum habet in impugnandis judiciorum sententiis & litium civilium decisionibus. Judicia inferiora & subordinata pronunciant & suis lites dirimunt sententiis in *prima*, quam vocant, *instantia*. Qui illorum sese decisione gravatum putat, eaque acquiescere sese posse negat, is provocare debet intra tempus fatale legitimum ad judicium supremum nostrum aulicum & provinciale, cujus sententia litem in *secunda* seu appellationis *instantia* decedit. Qui de sententia judicii illius supremi aulici & provincialis adhuc conquerendi causam sese habere arbitratur, is ad extremum revisionis remedium confugere, nisi causæ ratio illud respuat, debet & provocare. *Tertia* hæc *instantia* constituta est coram supremo, quod Berolini sedem habet, *Tribunali*, a quo nulla amplius provocatio est, & cujus sententiis lites omnium Nostræ dominationis provinciarum ultimam, constantem, & rescindi ac emendari nesciam fortiuntur decisionem.

In illis vero causis, quoad decisionem *primæ instantiæ* supremo judicio aulico & provinciali tribuendis & relinquendis, quas constitutis judiciis provincialibus subordinatis & inferioribus, accuratius determinabimus & definituri sumus, *secundæ instantiæ* disceputationem & decisionem Collegio Justitiæ supremo vicinæ provinciæ committendi & demandandi Nobis est consilium & animus, ejusque rei ordinandæ Nobis adhuc arbitrium reservamus. Verum ultima seu *tertia revisionis instantia* Tribunali Berolinensi supremo & generali etiam illis in causis semper adserta manet & vindicata.

Secundum prima & fundamentalia rei Nostræ judiciariæ principia non nisi tres disceputationum gradationes, tresque instantiæ permittuntur, & sententiæ in tertia & extrema pronunciatae instantia nullo sub obtentu impugnari & retractari queunt.

Sententiæ primæ vel secundæ instantiæ, neglecta provocatione, vim rei judicatae nactæ & consecutæ ejusdem sunt auctoritatis, omnis retractationis nesciæ.

Nos causarum decisione prorsus abstinemus, nec sanctius Nostrum Consilium ac Ministerium causis judiciali sententia dirimendis sese ingerit & immiscet, adeoque Nostra, ejusque decreta viribus & auctoritate rei judicatae prorsus destituuntur.

In criminalibus causis non nisi duæ conceduntur instantiæ, & unica permittitur provocatio, *ulterior dicta defensio*. Sententiæ utriusque instantiæ sub dicasterii supremi auspiciis & moderamine a Collegii criminalis assessoribus concipi debent.

Sicuti vero vita subditorum & libertas Nobis curæ in primis cordique est; ita illorum nemo capitali pœna, vel corporis afflictiva, ergastuli, vel operis publici perpetui & temporarii adficiendus & adfligendus est, nisi pro delictorum genere & gradu ad Nos, vel ad *sanctiorem Nostrum senatum*, ac *consilium ministrorum status* facta relatione, & probata a Nobis vel ab hoc & confirmata sententia.

XVI. Præter hancce generalem præceptionem et instructionem subditis Nostris, judiciisque provinciarum recens vindicatarum, legum quoque Nostrarum, ordinisque judiciarii brevem et luculentam delineationem et epitomen, quam hisce litteris patentibus sub A. adjungendam curavimus, impertimur, qua unusquisque edoceri potest, quo jure utatur, et quam normam in foro, et in negotiis privatis sequi debeat regulam.

Quem-

Quemadmodum vero leges ad præterita non possunt trahi negotia, sed futuris saltem formam præscribunt: ita sponte patet, omnes actus, omnes actiones, conventiones, contractus, pacta nuptialia, testamenta, dispositiones, et negotia qualiacunque omnia, ante harum litterarum patentium promulgationem celebrata, inita, condita, et juris intellectu perfecta, secundum leges harum ditionum et consuetudines huc usque observatas et usu vigentes judicari, exigi, æstimari et censeri debere.

Contra vero a die promulgatæ hujus sanctionis in provinciis et ditionibus vindicatis, et Regno Borussiae adjectis illæ leges, eaque jura, quæ in illo vigent, et in epitome adjuncta distincte enarrantur, unicam actionum et negotiorum, ordinisque judiciarii, ac forensis disceptationis normam et regulam præbere, colligi, observari et unice pro amissi, præcepto, formula omnium negotiorum et actuum, tam in foro, quam extra illud gerendorum et expediendorum haberi debent; ita et hac ratione, ut omnes actus hisce juribus legibusque contrarii et non conformes irriti et invalidi censendi sint et judicandi. Cum vero militares æque ac camerales causæ ad aliam administrationis partem spectent, de illis, illarumque legibus et ordinationibus alio Edicto speciali subditos provinciarum recens acquiritarum edocendos et erudiendos curabimus.

Hanc voluntatis Nostræ significationem omnibus et singulis, tam ecclesiasticis quam sæcularibus, clericis ac laicis terrarum Prussiae et Pomeraniae, a Regibus Poloniae huc usque possessorum, nec non tractuum cis amnem Notezum seu Notezam sitorum, ad majorem Poloniam huc usque relatorum, domini legitimi jure a Nobis vindicatorum incolis sollemniter notam facimus et promulgamus, iisque, et supremo, quod constituimus judicio aulico et provinciali, nec non omnibus illi subordinatis et subordinandis judicis imperamus et præcipimus, ut se et suas actiones et munitiorum suorum expeditionem huic normæ exactissime conforment, neque ullo sub obtentu scopo Nostrò consilioque, promtam hisce ditionibus procurandi sanctamque et integram justitiæ administrationem, renitentur atque resistent. Qui vero hæc præscripta nihilominus spernere, iis oblectari, vel refragari ausi fuerint, illi non modo succensionem et indignationem Nostram, sed severissimam quoque et rigorosam animadversionem incurrent, proterviamque suam gravi pœna expiabunt.

Cujus Nostræ voluntatis notitiam quo omnes et singuli consequantur, hæc litteras patentes, sigillo Nostrò Regio et Augusti Nominis subscriptione munitas rite et sollemniter promulgandas curavimus. Data Berolini die xxviii. Septembris A. MDCCLXXII.

FRIDERICVS.



de Fürst.

